



COLEG CYMRAEG CENEDLAETHOL

Cynllun Ysgoloriaethau Gradd Meistr

2011 – 2012

Amodau a Thelerau

Cyflwyniad

1. Mae Cynllun Ysgoloriaethau Gradd Meistr y Coleg Cymraeg Cenedlaethol [y Coleg] yn gynllun newydd sy'n cael ei gyflwyno ym mlwyddyn academiaidd gyntaf y Coleg (2011/12).
2. Mae'r Coleg yn cynnig ugain o ysgoloriaethau'r flwyddyn ar gyfer myfyrwyr sydd am astudio cyrsiau gradd meistr yn gyfan gwbl neu'n rhannol drwy gyfrwng y Gymraeg.
3. Y mae'r amodau a'r telerau sydd wedi eu nodi yn y ddogfen hon yn berthnasol i weithrediad y Cynllun yn 2011/12. Mae'r Coleg yn cadw'r hawl i amrywio'r telerau ar amodau yn y dyfodol, ac yn cadw'r hawl i wneud penderfyniadau polisi ychwanegol yn achos unrhyw fater sydd y tu hwnt i'r hyn sydd wedi ei gynnwys yn y ddogfen hon. Mewn achosion o'r fath, y mae'r Coleg yn cadw'r hawl i fabwysiadu penderfyniadau polisi o'r fath i reolau'r Cynllun yn y dyfodol.
4. Y mae swm yr ysgoloriaethau Gradd Meistr wedi ei nodi yng nghymal 20. Y mae'r ffigyrau hyn yn derfynol ar gyfer 2011/12, ond y mae'r Coleg yn cadw'r hawl i amrywio gwerth y dyfarniadau.
5. Yn ogystal ag amodau a thelerau'r Coleg ar gyfer y Cynllun y mae'r prifysgolion perthnasol yn cadw'r hawl i nodi amodau a thelerau ychwanegol.

Rheoliadau Cyffredinol

6. Mae'r ysgoloriaethau hyn yn agored i bob myfyriwr, yn amodol ar gydymffurfiaid â rheolau'r cynllun ac yn amodol ar gael eu derbyn i ddilyn un o'r cyrsiau cymwys.
7. Y mae pob dyfarniad yn amodol ar dderbyn cadarnhad y bydd y myfyriwr yn dilyn cwrs llawn amser yn unig. Ni fydd myfyriwr a fydd mewn swydd llawn amser neu ar secondiad o swydd barhaol yn gymwys i dderbyn ysgoloriaeth drwy'r cynllun hwn.

8. Mae'r Coleg yn cadw'r hawl i atal dyfarniadau os na cheir digon o geisiadau teilwng. Yn achos unrhyw ddyfarniadau a fydd wedi eu hatal, mae'r Coleg yn cadw'r hawl i ystyried ffyrdd eraill o ddyfarnu'r ysgoloriaethau.
9. Ni fydd modd i unrhyw unigolyn ddal mwy nag un ysgoloriaeth gan y Coleg ar yr un pryd.
10. Nid yw'r Cynllun yn atal ymgeiswyr rhag derbyn nawdd, gwobr neu ysgoloriaeth o ffynhonnell arall. Mater i brifysgolion unigol fydd penderfynu a oes modd i fyfyrwyr dderbyn ysgoloriaeth gan y Coleg yn ogystal ag ysgoloriaeth gan y brifysgol. Ym mhob achos, dylai'r myfyriwr ymgynghori â'r brifysgol berthnasol.
11. Hyd pob ysgoloriaeth yw deuddeg mis.
12. Mae'r Coleg yn cadw'r hawl i derfynu neu ddiddymu unrhyw ysgoloriaeth, yn amodol ar roi o leiaf dri mis o rybudd i'r deiliad.
13. Yn y dyfodol, bydd y Coleg yn cadw'r hawl i osod amod ei bod yn ofynnol i bob myfyriwr sydd yn derbyn ysgoloriaeth drwy'r Coleg ddilyn cymhwyster neu dystysgrif mewn sgiliau iaith Gymraeg a gaiff ei gyflwyno gan y Coleg.
14. Y mae'r broses ymgeisio wedi ei hamlinellu yng nghymal 24. Y mae'r dyddiadau cau a nodir yn derfynol, ac ni fydd modd derbyn ceisiadau a fydd wedi eu cyflwyno'n hwyr.
15. Ym mhob achos, y mae'n ofynnol i'r ymgeiswyr gwblhau eu ffurflen gais yn Gymraeg. Ni fydd ceisiadau a fydd wedi eu cyflwyno mewn unrhyw iaith ac eithrio'r Gymraeg yn gymwys.
16. Mae'r amodau a'r telerau a nodir yn y ddogfen hon yn derfynol. Y mae'n ofynnol i bob ymgeisydd nodi eu bod yn derbyn yr amodau hyn, ac y bydd y penderfyniadau dyfarnu yn derfynol.

Astudio drwy gyfrwng y Gymraeg

17. Prif nod y Cynllun Ysgoloriaethau Gradd Meistr yw galluogi mwy o fyfyrwr i astudio drwy gyfrwng y Gymraeg ar gyrsiau ôl-radd wedi eu haddysgu. Y mae pob dyfarniad yn amodol ar dderbyn cadarnhad fod y deiliad yn astudio'r nifer angenrheidiol o gredydau drwy gyfrwng y Gymraeg, yn unol â'r hyn a nodir o fewn cymal 20. Dyma brif amod yr ysgoloriaethau.
18. Os nad yw myfyriwr, am ba bynnag reswm, yn dilyn y nifer angenrheidiol o gredydau, bydd y Coleg yn atal y dyfarniad, ac yn cadw'r hawl i derfynu'r ysgoloriaeth. Gan mai dyma brif amod y dyfarniadau, mewn achosion o'r fath,

ni fydd yn ofynnol i'r Coleg roddi rhybudd i'r deiliad y bydd y cyllid yn cael ei atal neu ei derfynu.

19. Cyfrifoldeb y brifysgol sy'n cynnig y cwrs meistr yw sicrhau bod y nifer angenrheidiol o gredydau ar gael i'w hastudio drwy gyfrwng y Gymraeg er mwyn cyflawni gofynion y Cynllun. Ni fydd y Coleg yn derbyn unrhyw gyfrifoldeb os yw prifysgol, am ba bynnag reswm, yn methu cynnig y nifer gofynnol o gredydau. Mewn unrhyw achos o'r fath, y mae'n ofynnol i'r brifysgol gysylltu â'r Coleg ar unwaith i nodi nad ydynt mewn sefyllfa i gyflawni gofynion y Cynllun. Cyfrifoldeb y brifysgol fydd hysbysu'r myfyriwr o'r sefyllfa.

Y Cynllun Ysgoloriaethau Gradd Meistr

20. £1500 yw gwerth pob un o'r Ysgoloriaethau Gradd Meistr, ac maent ar gael i fyfyrwyr sy'n bwriadu astudio cyrsiau lefel M penodol, sy'n cynnwys o leiaf 60 credyd o ddarpariaeth cyfrwng Cymraeg yn Rhan 1. Ynghyd ag astudio cyfran o'r cwrs ei hun drwy gyfrwng y Gymraeg, rhaid i'r deiliaid lunio eu traethodau estynedig (neu'r hyn sy'n cyfateb i hynny) yn Gymraeg hefyd.

Trefniadau Ymarferol y Cynllun

21. Bydd yr Ysgoloriaethau Gradd Meistr yn cael eu cynnig yn uniongyrchol gan y Coleg a bydd yr arian yn cael ei dalu'n syth i gyfrif banc y myfyrwyr. Bydd y Coleg yn gofyn i bob ymgeisydd a fydd yn cael cynnig ysgoloriaeth i ddarparu manylion banc er mwyn prosesu'r taliadau yn amodol ar gyflawni amodau'r Cynllun.
22. Ar ddechrau blwyddyn academiaidd 2011/12 gwahoddir myfyrwyr sydd wedi derbyn ysgoloriaethau i gyfarfod yn eu prifysgol lle byddant yn derbyn manylion llawn am y wybodaeth y bydd yn ofynnol iddynt ei gyflwyno i'r Coleg er mwyn cadarnhau'n swyddogol eu bod yn cyflawni gofynion y Cynllun. Bydd y wybodaeth hon yn cynnwys gwybodaeth lawn am y modiwlau y bydd y deiliad yn ei astudio yn y brifysgol. Yn amodol ar dderbyn y wybodaeth hon, a sicrhau fod y deiliad yn cyflawni gofynion y Cynllun, bydd y Coleg yn cadarnhau'n swyddogol fod y deiliad yn gymwys i dderbyn yr ysgoloriaeth.
23. Bydd taliadau'r ysgoloriaeth yn y flwyddyn gyntaf yn cael eu cwblhau ym mis Mawrth 2012 yn amodol ar dderbyn cadarnhad gan y brifysgol berthnasol fod y deiliad yn parhau i astudio ar gwrs cymwys ac yn dilyn y nifer angenrheidiol o gredydau drwy gyfrwng y Gymraeg.

Proses Ymgeisio

24. Y dyddiad cau ar gyfer ceisiadau am Ysgoloriaethau Gradd Meistr yw hanner dydd, ddydd Gwener 15 Gorffennaf 2011. Gellir cyflwyno ceisiadau electronig neu

geisiadau ysgrifenedig. Rhaid cyflwyno'r ceisiadau hyn i'r Coleg, yn unol â'r cyfarwyddiadau ar y ffurflen gais. Ni dderbynnir ceisiadau a gyflwynir yn hwyr.

Proses Ddyfarnu

25. Yn dilyn y dyddiad cau bydd pob cais a gyflwynir i'r Coleg yn cael ei asesu ar sail cyrhaeddiad academaidd, y datganiad personol a'r geirada academaidd. Dyrennir yr ysgoloriaethau ar sail academaidd.
26. Bydd y Coleg yn amcanu i sicrhau dosbarthiad ysgoloriaethau ar draws ystod o ddisgyblaethau gan gynnwys gosod terfyn ar y nifer o ysgoloriaethau a ddyfernir i unrhyw ddisgyblaeth benodol. Ni fydd mwy na phum ysgoloriaeth yn cael eu dyfarnu ym maes Iaith a Llenyddiaeth Gymraeg.
27. Yn dilyn derbyn cadarnhad o'r dyfarniadau llwyddiannus, bydd y Coleg yn cyhoeddi rhestr lawn o'r dyfarniadau yn y wasg ac ar wefan y Coleg.

Mae'r amodau a'r telerau sydd wedi eu hamlinellu yn y ddogfen hon yn derfynol, ac i'w gweithredu'n llawn ar gyfer pob dyfarniad o'r Cynllun Ysgoloriaethau Gradd Meistr yn 2011/12.